
ФАРҒОНА ВИЛОЯТИ БЎЙИЧА БИР КУНДА 13 ТА ТУМАНДА ЯНГИ ҚУРИБ БИТКАЗИЛГАН “ХУНАРМАНДЛАР МАРКАЗЛАРИ” ФОЙДАЛАНИШГА ТОПШИРИЛДИ

Тошлоқ туманидаги 300 ўринли "Хунармандлар маркази" очилишида вилоят ҳокими Хайрулло Бозоров, Ўзбекистон Савдо-саноат палатаси раиси Адҳам Икрамов, Ўзбекистон Республикаси "Хунарманд" уюшмаси раиси Улуғбек Абдуллаев ва кенг жамоатчилик вакиллари қатнашдилар.

“Президентимиз топшириқ бердилар. “Хунармандлар маркази”ни қуриб битказдирдик. Мақсад энди буни ривожлантириш, ҳар битта хунарманднинг ёнига биттадан шогирдни қилиб, касаначилик қилиб, хунаримизни давом эттириш”, - деди вилоят раҳбари.

Шундан сўнг карнай-сурнай садолари билан рамзий тасма қирқилди. Марказ раҳбари, машҳур хунарманд Иброҳимжон Султоновга тантанали тарзда рамзий калит топширилди. Меҳмонлар 3 қаватли бино ичкарасига кириб, бу ердаги савдо комплекси ва кўргазмалар зали, гилам тўқиш ҳамда атлас ва адрас матоларини ишлаб чиқариш бўлимлари билан танишдилар.

Хайрулло Бозоров ва Адҳам Икрамов Олтиариқ ва Риштон туманларида ҳам кўтаринки кайфиятда ўтган “Хунармандлар марказ”ларининг очилиш маросимларида иштирок этдилар. Тадбир қатнашчилари ушбу марказлар фаолиятини янада жонланишига, уларда кўплаб иш ўринлари яратилиб, юртдошларимиз турмуш фаровонлиги ошишига ҳисса қўшишига ишонч билдирдилар.

Тадбирлар давомида ишлаб чиқарилаётган маҳсулотлар савдоси учун янги бозорларни топиш, бунинг учун тарғибот ишларини кучайтириш, ижтимоий тармоқлар имкониятларидан самарали фойдаланиш, хунармандларни қўллаб-қувватлаш юзасидан мутасадди раҳбарлар иштирокида фикр-мулоҳазалар алмашилди. Нафақат "Хунармандлар марказ"ларининг ўзида балки, шу марказларга бириктирилган ҳолда уй шароитида ҳам фаолият олиб боровчи хотин-қизларни кўпайтириш юзасидан таклифлар билдирилди.

Кун давомида вилоят маҳаллий бюджет маблағлари ҳисобидан 57,9 млрд.сўм ажратилган жами 13 та янги “Хунармандлар марказ”лари иш бошлади.

Уларда 4000 нафар ишсиз фуқаролар, айниқса, аёллар ва ёшларнинг бандлигини таъминлаш режалаштирилган.